

5. O ministro de Agricultura, Pesca e Alimentación, unha vez valorada a documentación presentada e tralo informe das comunidades autónomas afectadas, regulará a utilización da indicación xeográfica mediante a aprobación da correspondente orde.

6. Para a regulación da utilización das indicacións xeográficas que aprobe o Ministerio de Agricultura, Pesca e Alimentación, serán de aplicación, ademais dos requisitos previstos nos artigos 3 e 4 deste real decreto, os seguintes extremos:

a) Os contidos máximos en anhídrido sulfuroso total, dos viños con dereito á mención «viño da terra» dispostos para o consumo que contén cun nivel en azucres residuais inferior a 5 gramos por litro, serán os seguintes: 200 miligramos por litro para os viños brancos e rosados; 150 miligramos por litro para os viños tintos.

Se os viños teñen máis de 5 gramos de azucres residuais por litro, os límites serán os seguintes: 250 miligramos por litro para os viños brancos e rosados; 200 miligramos por litro para os viños tintos.

b) A acidez volátil dos viños dispostos para o consumo non será superior a 0,8 gr/l expresada en ácido acético, salvo os que fosen sometidos a algún proceso de crianza, caso no que este límite non será superior a 1 gr/l, sempre que a súa graduación alcohólica sexa igual ou inferior a dez graos. Para os viños con crianza de maior graduación, este límite de acidez volátil será incrementado en 0,06 gramos por cada grao de alcohol que exceda dos dez graos.

c) Referencia ó organismo de certificación que deberá ser autorizado, para cada caso, polo Ministerio de Agricultura, Pesca e Alimentación.

Artigo 7. *Deber de colaboración.*

1. As comunidades autónomas comunicaranlle ó Ministerio de Agricultura, Pesca e Alimentación as indicacións xeográficas que autoricen no seu ámbito territorial para a designación dos viños de mesa.

2. O Ministerio de Agricultura, Pesca e Alimentación publicará periodicamente no «Boletín Oficial del Estado» a lista actualizada de tódalas indicacións xeográficas autorizadas para a designación de viños de mesa e, posteriormente, comunicarlalla á Comisión da Unión Europea en cumprimento da normativa comunitaria.

Disposición adicional única. *Título competencial.*

Este real decreto promúlgase ó abeiro do previsto no artigo 149.1.13.^a da Constitución, que lle atribúe ó Estado a competencia exclusiva sobre bases e coordinación da planificación xeral da actividade económica.

Disposición transitoria única. *Réxime transitorio para a utilización das indicacións xeográficas preexistentes.*

1. Os viños de mesa con indicacións xeográficas elaborados antes da entrada en vigor deste real decreto e que cumpran a normativa establecida nas ordes do 11 de decembro de 1986 e do 23 de decembro de 1999, pero non se axusten ó disposto nel, poderán seguir comercializándose con esas indicacións xeográficas ata o final de existencias.

2. As indicacións xeográficas aprobadas con anterioridade á entrada en vigor deste real decreto, e que non cumpran co disposto nel, poderán seguir utilizándose, se tivesen dereito a iso conforme a normativa establecida nas ordes do 11 de decembro de 1986 e do 23 de decembro de 1999, durante un período máximo

dos tres anos seguintes á entrada en vigor deste real decreto.

Disposición derogatoria única. *Derrogación normativa.*

Sen prexuízo do contido na disposición transitoria única, quedan derogadas as ordes deste departamento do 11 de decembro de 1986 e do 23 de decembro de 1999.

Disposición derradeira primeira. *Facultade de desenvolvemento.*

Facúltase o ministro de Agricultura, Pesca e Alimentación para que, no ámbito das súas competencias, dicte cantas disposicións sexan necesarias para o desenvolvemento e aplicación deste real decreto.

Disposición derradeira segunda. *Entrada en vigor.*

Este real decreto entrará en vigor o día seguinte ó da súa publicación no «Boletín Oficial del Estado».

Dado en Madrid o 20 de abril de 2001.

JUAN CARLOS R.

O ministro de Agricultura, Pesca e Alimentación,
MIGUEL ARIAS CAÑETE

9095 *REAL DECRETO 441/2001, do 27 de abril, polo que se modifica o Real decreto 348/2000, do 10 de marzo, polo que se incorpora ó ordenamento xurídico a Directiva 98/58/CE, relativa á protección dos animais nas explotacións gandeiras. («BOE» 114, do 12-5-2001.)*

O Real decreto 348/2000, do 10 de marzo, polo que se incorpora ó ordenamento xurídico a Directiva 98/58/CE, relativa á protección dos animais nas explotacións gandeiras, foi dictado coa finalidade de protexelos animais nas explotacións gandeiras, así como de evitar distorsións no desenvolvemento da produción e propicia-lo bo funcionamento da organización do mercado dos animais.

Una vez publicado oficialmente, presentáronse cuestións de carácter competencial en relación co seu artigo 5, relativo ás inspeccións e controis das explotacións gandeiras derivados das actuacións da Unión Europea, que motivaron, por razóns de seguridade xurídica e como salvagarda das competencias que tanto o Estado como as comunidades autónomas teñen na materia, a necesidade da súa modificación.

Na súa tramitación foron consultadas as comunidades autónomas e as entidades representativas do sector afectado.

Na súa virtude, por proposta do ministro de Agricultura, Pesca e Alimentación, de acordo co Consello de Estado e logo de deliberación do Consello de Ministros na súa reunión do día 27 de abril de 2001,

DISP O Ñ O :

Artigo único. *Modificación do Real decreto 348/2000, do 10 de marzo, polo que se incorpora ó ordenamento xurídico a Directiva 98/58/CE, relativa á protección dos animais nas explotacións gandeiras.*

O artigo 5. Controis da Comisión Europea, queda redactado da seguinte forma:

«Artigo 5. *Controis da Comisión Europea.*

1. Representantes do Ministerio de Agricultura, Pesca e Alimentación poderán acompañar os expertos veterinarios da Comisión Europea e os representantes dos órganos competentes das comunidades autónomas que realicen as inspeccións e controis previstos no artigo 7 da Directiva 98/58/CE, do Consello, do 20 de xullo, todo iso sen prexuízo da remisión do informe a que se refire o artigo anterior.

2. Cando se realicen estas inspeccións, os órganos competentes das comunidades autónomas deberanlles prestar ós expertos veterinarios da Comisión Europea toda a asistencia que necesiten para o cumprimento do seu cometido.

3. O resultado dos controis efectuados deberá discutirse entre os expertos veterinarios da Comisión Europea e os representantes da Dirección Xeral de Gandería do Ministerio de Agricultura, Pesca e Alimentación, antes da elaboración e difusión dun informe definitivo, establecéndose, para estes efectos, entre o Ministerio e os órganos competentes das comunidades autónomas afectadas, os mecanismos de colaboración oportunos.

4. Os órganos competentes das comunidades autónomas adoptarán as medidas necesarias para ter en conta os resultados das inspeccións e dos controis efectuados que se establezan no informe definitivo.»

Disposición adicional única. *Título competencial.*

Este real decreto ten o carácter de normativa básica estatal e dítase ó abeiro do disposto no artigo 149.1.13.^a e 16.^a da Constitución, que lle atribúe ó Estado a competencia sobre bases e coordinación da planificación xeral da actividade económica e sobre bases e coordinación xeral da sanidade.

Disposición derradeira única. *Entrada en vigor.*

Este real decreto entrará en vigor o día seguinte ó da súa publicación no «Boletín Oficial del Estado».

Dado en Madrid o 27 de abril de 2001.

JUAN CARLOS R.

O ministro de Agricultura, Pesca e Alimentación,
MIGUEL ARIAS CAÑETE

MINISTERIO DA PRESIDENCIA

9096 *REAL DECRETO 507/2001, do 11 de maio, polo que se modifica o Regulamento sobre notificación de substancias novas e clasificación, envasado e etiquetaxe de substancias perigosas, aprobado polo Real decreto 363/1995, do 10 de marzo. («BOE» 114, do 12-5-2001.)*

O Real decreto 363/1995, do 10 de marzo, polo que se aproba o Regulamento sobre notificación de substancias novas e clasificación, envasado e etiquetaxe de substancias perigosas, incorporou ó dereito interno, entre outras, a Directiva 92/32/CEE do Consello, do

30 de abril, pola que se modifica por sétima vez a Directiva do Consello 67/548/CEE, relativa á aproximación das disposicións legais, regulamentarias e administrativas en materia de clasificación, embalaxe e etiquetaxe de substancias perigosas, así como a Directiva 93/90/CEE da Comisión, do 29 de outubro, que a desenvolve, no relativo a unha lista de substancias exentas do procedemento de notificación de substancias novas da Directiva 92/32/CEE xa mencionada.

Recentemente publicouse a Directiva 2000/21/CE da Comisión, do 25 de abril, que substitúe a Directiva 93/90/CEE, que quedou derogada.

Procede, polo tanto, incorporar ó noso ordenamento xurídico os preceptos contidos na Directiva 2000/21, que por afecta-lo articulado do Regulamento sobre notificación de substancias novas e clasificación, envasado e etiquetaxe de substancias perigosas, aprobado polo Real decreto 363/1995, antes citado, se fai mediante esta norma. Esta dítase ó abeiro do disposto no artigo 149.1.16.^a e 23.^a da Constitución e de acordo co artigo 40, números 5 e 6, da Lei 14/1986, do 25 de abril, xeral de sanidade.

Na súa virtude, por proposta das ministras de Sanidade e Consumo e de Ciencia e Tecnoloxía, ós dos sectores afectados, de acordo co Consello de Estado e logo de deliberación do Consello de Ministros na súa reunión do día 11 de maio de 2001,

DISPONGO:

Artigo único. *Ampliación da lista de exencións da notificación de substancias novas.*

Modifícanse as alíneas e) e f) e engádese unha nova alínea g), no número 1 do artigo 13 do Regulamento sobre notificación de substancias novas e clasificación, envasado e etiquetaxe de substancias perigosas, aprobado polo Real decreto 363/1995, do 10 de marzo, e modificado polo Real decreto 700/1998, do 24 de abril.

1. As alíneas e) e f) substitúense polo texto seguinte:

«e) os ingredientes activos utilizados exclusivamente para os produtos fitosanitarios, incluso para fins de investigación e desenvolvemento,

f) as substancias utilizadas exclusivamente como substancias activas de biocidas, incluso para fins de investigación e desenvolvemento.»

2. A actual alínea f) pasa a ser alínea g) co seguinte contido:

«g) as substancias utilizadas exclusivamente para outras categorías de produtos para as que existan procedementos de notificación ou de homologación idénticos ós esixidos neste regulamento.»

Disposición derradeira única. *Entrada en vigor.*

Este real decreto entrará en vigor o día seguinte ó da súa publicación no «Boletín Oficial del Estado».

Dado en Madrid o 11 de maio de 2001.

JUAN CARLOS R.

O ministro da Presidencia,

JUAN JOSÉ LUCAS GIMÉNEZ